

ঝড়

উঠিয়াছে ঝড়

উঠিয়াছে ঝড়, কড় কড় কড় ঈশানে নাকাড়া বাজিছে তার,
ওরে ভীক, ওঠ, এখনি টুটিবে ধমকে তাহার রুদ্ধ দ্বার !
কৃষ্ণ মেঘের নিশান তাহার দোলে পশ্চিম-তোরণে ঐ,
ক্রকুটি-ভঞ্জে কোটি তরঙ্গে নাচে নদনদী তাঁথে থৈ ।
তরবারি তার হানিছে ঝিলিক সর্পিল বিদ্যুল্পেখায়,
হানিবে আঘাত তোর স্বপ্নের শিশ-মহলের দরওয়াজায় ;
কাঁদিবে পূর্ব পুবালী হাওয়ায়, ফোটাবে কদম জুঁই কুসুম ;
বৃষ্টিধারায় ঝরিবে অশ্রু, ঘনালে প্রলয় রবে নিঝুম ?

যে দেশে সূর্য ডোবে—সেই দেশে হইল নবীন সূর্যোদয়,
উদয়-অচলে টলমল করে অস্ত-রবির আঁধার ভয় !
যুগ যুগ ধরি, তপস্যা দিয়ে করেছি মহীরে মহামহান,
ফুটায়েছি ফুল কর্ষিয়া মরু, ধুলির উর্ধ্বে গেয়েছি গান ।
আজি সেই ফুল-ফসল-মেলায় অধিকার নাই আমাদেরই,
আমাদের ধ্যান-সুন্দর ধরা আমাদের নয় আজি হেরি !
গীত-শেষে নীড়ে ফিরিবার বেলা হেরি নীড়ে বাসা বেঁধে শকুন,
মাংস-লোলুপ ফিরিতেছে ব্যাধ স্ফঞ্জে রক্ত-ধনুগুণ ।
নীড়ে ফিরিবার পথ নাই তোর, নিম্নে নিষাদ, উর্ধ্বে বাজ,
তোর সে অতীত মহিমা আজিকে তোরে সব চেয়ে হানিছে লাজ !

উঠিয়াছে ঝড়—ঝড় উঠিয়াছে প্রলয়-রণের আমন্ত্রণ,
‘আদাওতী’র এ দাওতে কে যাবি মৃত্যুতে প্রাণ করিয়া পণ ?
ঝড়ে যা উড়িবে, পুড়িবে আগুনে, উড়ুক পুড়ুক সে সকল,
মৃত্যু যেখানে ধ্রুব তোর সেথা মৃত্যুরে হেসে বরিষি চল !
অপরিমাণ এ জীবনে করিবি জীবিতের মতো ব্যয়-মদি,
উর্ধ্বে থাকুক ঝড়ের আশিস, চরণে মরণ-অস্ভূষি !

বিধাতার দান এই পবিত্র দেহের করিবি অসম্মান ?

শকুন-শিবির খাদ্য হইবি, ফিরায়ে দিবি না খোদার দান ?

এ-জীবন ফুল-অঞ্জলি সম নজরানা দিবি মৃত্যুরে,—
 জীবিতের মতো ভুঞ্জি জীবন ব্যয় করে যা তা প্রাণ পুরে !
 চরণে দলেছি বিপুলা পৃথ্বী কোটি গ্রহ তারা ধরি শিরে,
 মোদের তীর্থ লাগি রবি শশী নিশিদিন আসে ফিরে ফিরে।
 নিঃসীম নভ ছত্র ধরিয়া, বন্দনা-গান গাহে বিহঙ্গ,
 বর্ষায় করে রহমত-পানি-প্রতীক্ষমান সাত স্বরগ।
 অপরিমাণ এ দানেরে কেমনে করিবি, রে ভীকু অস্বীকার ?
 মৃত্যুর মারফতে শোধ দিব বিধির এ মহাদানের ধার।
 রোগ-পাগুর দেহ নয়—দিব সুন্দর তনু কোরবানি,
 রোগ ও জ্বারে দিব না এ দেহ জীবন ফুলের ফুলদানি।
 তাজা এ স্বাস্থ্য সুন্দর দেহ মৃত্যুরে দিবি অর্ঘ্যদান,
 অতিথিরে দিবি কীটে-খাওয়া ফুল ? লতা ছিড়ে তাজা কুসুম আন !

আসিয়াছে ঝড়, ঘরের ভিতর তাজিম করিয়া অতিথে ডাক,
 বন্ধুর পথে এসেছে বন্ধু, হাসিয়া দন্তে দন্ত রাখ।
 যৌবন-মদ পূর্ণ করিয়া জীবনের মৃৎপাত্র ভর,
 তাই নিয়ে সব বেঁধুশ হইয়া ঝঞ্ঝার সাথে পাঞ্জা ধর।

ঝঞ্ঝার বেগ রুধিতে নারিবে পড়-পড় ঐ গৃহ রে তোর,
 ঝুঁটি ধরে তার কেন বৃথা আর থাকিস বসিয়া, ভাঙ এ দোর !
 রবির চুল্লি নিভিয়া গিয়াছে, ধুমায়মান নীল গগন,
 ঝঞ্ঝা এসেছে ঝাপটিয়া পাখা, ধেয়ে আয় তুই ক্ষীণ পবন !

শাখ-ই-নবাত

[‘শাখ-ই-নবাত’ বুলবুল-ই-শিরাজ কবি হাফিজের মানসী প্রিয়া ছিলেন।

‘শাখ-ই-নবাত’-এর অর্থ ‘আখের শাখা’।]

শাখ-ই-নবাত ! শাখ-ই-নবাত ! মিষ্টি রসাল ‘ইক্ষু-শাখা’।
 বুলবুলিরে গান শেখাল তোমার আঁখি সূর্য-মাখা।
 বুলবুল-ই-শিরাজ হলো গো হাফিজ গেয়ে তোমার স্তুতি,
 আদর করে ‘শাখ-ই-নবাত’ নাম দিল তাই তোমার তৃতী।
 তার আদরের নাম নিয়ে আজ তুমি নিখিল-পরবিনী,
 তোমার কবির চেয়ে তোমায় কবির গানে অধিক চিনি।

মধুর চেয়ে মধুরতর হলো তোমার বঁধুর গীতি,
তোমার রস-সুধা পিয়ে, তাহার সে-গান তোমার স্মৃতি।
তোমার কবির—তোমার তৃতীর ঠোট ভিজ্জালে শহদ দিয়ে,
নিখিল হিয়া সরস হলো তোমার শিরীন সে রস পিয়ে।

... ..
কল্পনারই রঙিন পাখায় ইরান দেশে উড়ে চলি,
অনেক শত বছর পিছের আঁকাবাঁকা অনেক গলি—
তোমার সাথে প্রথম দেখা কবির যেদিন গোধূলিতে,
আঙুর-স্ফেতে গান ধরেছে, কুলায়-ভোলা বুলবুলিতে।
দাঁড়িয়েছিলে একাকিনী 'রোকনাবাদের নহর'-তীরে,
আসমানি নীল ফিরোজা রং ছিল তোমার তনু ঘিরে।
রঙিন ছিল আকাশ যেন কুসুম-ভরা ডালিম-শাখা
তোমার চোখের কোনায় ছিল আকাশ-ছানা কাজল আঁকা।
সন্ধ্যা ছিল বন্দী তোমার খোঁপায়, বেণীর বন্ধনীতে;
তরুণ হিয়ার শরম ছিল জমাট বেঁধে বুকের ভিত্তে।
সোনার কিরণ পড়েছিল তোমার দেহের দেউল চূড়ে,
ডাঁশা আঙুর ভেবে এল মো-পিয়াসী ভ্রমর উড়ে।
তিল হয়ে সে রইল বসে তোমার-গালের গুলদানিতে,
লহর বয়ে গেল সুখে রোকনাবাদের নীল পানিতে।
চাঁদ তখনো লুকিয়ে ছিল তোমার চিবুক গালের টোলে,
অস্ত-রবির লাগল গো রঙ শূন্য তোমার সিঁথির কোলে।
ওপারেতে একলা তুমি নহর-তীরে লহর তোল,
এপারেতে বাজল বাঁশি, 'এসেছি গো নয়ন খোল!'

... ..
তুললে নয়ন এপার পানে—মেলল কি দল নাগিস তার?
দুটি কালো কাজল আখর—আকাশ ভুবন রঙিন বিথার!
কালো দুটি চোখের তারা, দুটি আখর, নয় কো বেশি;
হয়তো 'প্রিয়', 'কিস্বা বঁধু'—তারও অধিক মেশামেশি!
কি জানি কি ছিল লেখা—তরুণ ইরান-কবিই জানে,
সাধা বাঁশি বেসুর বোলে সেদিন প্রথম কবির কানে।
কবির সুখের দিনের রবি অস্ত গেল সেদিন হতে,
ঘিরল চাঁদের স্বপন-মায়া মনের বনের কুঞ্জপথে।
হয়তো তুমি শোননি আর বাঁশুরিয়ার বংশীধ্বনী,
স্বপন সম বিদায় তাহার স্বপন সম আগমনী।

রোকনাবাদের নহর নীরের সকল লহর কবির বুকে,
 ডেউ তোলে গো সেদিন হতে রাত্রি দিবা গভীর দুখে।
 সেই যে দুটি কাজল হরফ দুটি কালো আঁখির পাতে,
 তাই নিয়ে সে গান রচে তার; সুরের নেশায় বিশ্ব মাতে!
 অরুণ আঁখি তব্বী সাকি পাত্র এবং শারাব ভুলে,
 চেয়ে থাকে কবির মুখে করুণ তাহার নয়ন তুলে;
 শারাব হাতে সাকির কোলে শিরাজ কবির রঙিন নেশা
 যায় গো টুটে ক্ষণে ক্ষণে—মদ মনে হয় অশ্রু মেশা।
 অধর—কোণে হাসির ফালি ঈদের পহিল চাঁদের মতো—
 উঠেই ডুবে যায় নিমেষে, সুর যেন তার হৃদয়-স্কৃত।
 এপারে ঘুরে কবির সে গান ফুলের বাসে দখিন হাওয়ায়
 কেঁদে ফিরেছিল কি গো তোমার কানন—কুণ্ড ছায়ায়?
 যার তরে সে গান রচিল, তারি শোনা রইল বাকি?
 শুনল শুধু নিমেষ—সুখের শারাব—সাথী বে—দিল সাকি?

শাখ—ই-নবাত! শাখ—ই-নবাত! পায়নি তুতী তোমার শাখা,
 উধাও হলো তাইতে গো তার উদাস বাণী হুতাশ—মাখা।
 অনেক সাকির আঁখির লেখা, অনেক শারাব পাত্র—ভরা,
 অনেক লাল নাগিস গুল বুলবুলিস্তান গোলাব—ঝোরা—
 ব্যর্থ হলো, মিটল না গো শিরাজ কবির বৃকের ভ্রুয়া,
 হয়তো আখের শাখায় ছিল সুধার সাথে বিষও মিশা!
 নৈলে এ গান গাইত কে আর, বইত না এ সুরধুনী;
 তোমার হয়ে আমরা নিখিল বিরহীরা সে গান শুনি।
 আঙুর—লতায় গোটা আঙুর ফোঁটা ফোঁটা অশ্রুবারি,
 শিরাজ—কবির সাকির শারাব রঙিন হলো তাই নিঙাডি।
 তোমায় আড়াল করার ছলে সাকির লাগি যে গান রচে,
 তাতেই তোমায় পড়ায় মনে, শুনে সাকি অশ্রু মোছে!
 তোমার চেয়ে মোদের অনেক নসিব ভালো, হয় ইরানি।
 শুনলে না কো তোমায় নিয়ে রচা তোমার কবির রশ্মী।
 তোমার কবির রচা গানে মোদের প্রিয়র মান ভাঙাতে
 তোমার কথা পড়ে মনে, অশ্রু ঘনায় নয়ন—পদ্মতে!

ঘুমায় হাফিজ 'হাফেজিয়া'য়, ঘুমাও তুমি নহর—পারে,
 দীওয়ানার সে দীওয়ান—গীতি একলা জাগে কবর—ধারে।

তেমনি আজো আঙুর ক্ষেতে গেয়ে বেড়ায় বুলবুলিরা,
তৃতীর ঠোটে মিষ্টি ঠেকে তেমনি আজো চিনির সিরি।
তেমনি আজো জাগে সাকি পাত্র হাতে পানশালাতে—
তেমনি করে সূর্য-লেখা লেখে ডাগর নয়ন-পাতে।
তেমনি যখন গুলজার হয় শারাব-খানা, 'মুশায়েরা',
মনে পড়ে রোকনাবাদের কুটির তোমার পাহাড়-ঘেরা।
গোধূলি সে লগ্ন আসে, সন্ধ্যা আসে ডালিম-ফুলী,
ইরান মুলুক বিরান ঠেকে, নাই সেই তান, সেই বুলবুলি।
হাফেজিয়ায় কাঁদন ওঠে আজো যেন সন্ধ্যা প্রভাত—
'কোথায় আমার গোপন প্রিয়া কোথায় কোথায় শাখ-ই-নবাত !'
দন্তে কেটে খেজুর-মেতী আপেল-শাখায় অঙ্গ রেখে
হয়তো আজো দাঁড়াও এসে পোশোয়াজে নীল আকাশ মেখে,
শারাব-খানায় গজল শোন তোমার কবির বন্দনা-গান;
তেমনি করে সূর্য ডোবে, নহর-তীরে বহে তুফান।
অথবা তা শোনো না গো, শুনিবে না কোনো কালেই;
জীবনে যে এল না তা কোনো লোকের কোথাও সে নেই!

অসীম যেন জিজ্ঞাসা ঐ ইরান-মরুর মরীচিকা,
জ্বালানি কি শিরাজ-কবির লোকে তোমার প্রদীপ-শিখা?
বিদায় যেদিন নিল কবি শূন্য শারাব পাত্র করে,
নিঙড়ে অধর দাওনি সুধা তৃষিত কবির তৃষ্ণা হরে!
পাঁচ শো বছর খুঁজেছে গো, তেমনি আজো খুঁজে ফিরে
কবির গীতি তেমনি তোমায় রোকনাবাদের নহর-তীরে!

শহদ-মধু। মুশায়েরা—কবি-চক্র। হাফেজিয়া—কবি হাফিজের সমাধিস্থল। রোকনাবাদ—এরই
নহর-তীরে কবির কুটির ছিল। বিরান—মরুভূমি।

গদাই-এর পদ বন্ধি

দু-পেয়ে জীব ছিল-গদাই বিবাহ না করে!
কুক্ষণে তার বিয়ে দিয়ে দিল সবাই ধরে॥
আইবুড়ো সে ছিল যখন, মনের সুখে উড়ত
হাস্তা দুখান পা দিয়ে সে নচত, কঁদত, ছুড়ত॥

কিয়ে করে গদাই
দেখলে সে আর উড়তে পারে, ভারি ঠেকে সদাই।
এ্যাডিশনাল দুখান ঠ্যাং বেড়ায় পিছে নড়ে।

তার পা দুখানা মোটা, বৌর দুখানা সরু,
ছেট বড় চারখানা পা, ঠিক যেন ক্যাঙ্গারু !

ঘরে এলে জরু
দেখলে গদাই, মানুষ সে নাই, হয়ে গেছে গরু !
দড়বড়াতো 'বেসের' ঘোড়া, এখন সে নড়বড়ে ॥

অফিসে পদ বৃদ্ধি হয় না, ঘরে ফি বছরে
পা বেড়ে যায় গড়পড়তায় দুচারখান করে।

বৌ শোনে না মানা—
হন্যে হয়ে কন্যে আনে, মা বস্তীর ছানা।
মানুষ থেকে চার পেয়ে জীব, শেষ ছ পেয়ে মাছি,
তারপর আট পেয়ে পিপড়ে, গদাই বলে গেছি !

কেমোর প্রায় গদাই
ছুঁলেই এখন জড়সড়, জ্বড়জঙ্গ সদাই
বিয়ে করে মানুষ কি এই কেলেকারির তরে ?
দুপেয়ে জীব ছিল গদাই বিবাহ না করে ॥

কথ্যভাষা

কথ্যভাষা কইতে নারি শুধু কথা ভিন্ন।
নেড়ায় আমি নিম্ন বলি (কারণ) ছেঁড়ায় বলি ছিন্ন ॥

গোঁসাইকে কই গোস্বামী, তাই মশাইকে মোস্বামী।
বানকে বলি বন্যা, আর কানকে কন্যা কই আমি ॥
চাষায় আমি চলল বলি, আশায় বলি অশু।
কোটকে বলি কোষ্ট, আর নাসায় বলি নস্য ॥
শশারে কই শিশ্য আমি, ভাষারে কই ভীষ্য।
পিসিরে কই পিষ্টক আর মাসিরে মাহিষ্য ॥

পুকুরকে কই প্রফুরিণী, কুকুরকে কই কুকু।
 বদনকে কই বদনা, আর গাভুকে গুডুকু ॥
 চাঁড়ালকে কই চণ্ডাল, তাই আড়ালকে কই অণ্ডাল।
 শালারে কই শলাকা, আর কালায় বলি কঙ্কাল ॥
 শ্বশুরকে কই শুশু, স্মার দাদাকে কই দদু।
 বামারে কই বম্বু, আর কাদারে কই কদু ॥
 আরো অনেক বাত্রা-জানি, বুঝলে ভায়া মিটু।
 ভেবেছ সব শিখে নেবে, বলছি নে আর কিস্ত ॥

দীওয়ান-ই-হাফিজ

ত্যাগি মসজিদ কাল মুর্শিদ মম আস্তানা নিল মদশালা,
 নেবে কোন পথ এবে পথ-রথ ওগো সুহুদ সখি

পথ-বালা !

আমি মুসাফির যত শারাবির ঐ খারাবির পথ-মঞ্জিলে,
 সখি মাফ চাই, বিধি এই রায় ভালো লিখেছিলে

আমি জ্বলিলে।

‘কাবা শরিফের’ পানে করি ফের মুখ কোন বলে আমি

কও সখি,

পীর শারাবের পথ-মদরত যবে, আন-পথে যাবে

শিষ্য কি ?

জ্ঞান বোঝে যদি কেন বাঁধি হৃদি প্রিয়া-কুন্তল-ফাঁদে

সেখে সেখে,

যত জ্ঞানী পীর ঐ জিজির লাগি, দিওয়ান্য হবে গো

কৈদে-কৈদে।

মম ঠোটে ও গো বধু ‘আয়েত-মধু’ যে ঢালে তব মুখ

‘কোর-আনে’,

তাই সুখা আর সীধু ফেটে পড়ে শুধু কবিতাতে আর

মোর গানে।

মম অগ্নি-বর্ষা ‘আহা’ শ্বাস আর একা-রাত্রে জাগা

কাতরানি।

তব মর্মর-মোড়া মর্মে ক্রি দিল ব্যথা-আঁকি কোনো

রাত বাণী !

মম-ময়ূরী লাগি 'বিরহ'-ভুজগী ফেঁসেছিল ভালো
 কেশ-জালে
 কেন খুলে দিয়ে বেনী 'বিচ্ছেদ'-ফণী ছেড়ে দিলে প্রিয়া
 শেষকালে !
 তব এলোচুলে বায়ু গেল বুলে মম আলো নিঙে গেল
 আঁধিয়াবে,
 ঐ কালোকেশে আমি ভালোবেসে শেষে দেশে দেশে
 ফিরি কাঁদিয়াবে ;
 মোর বুক ফাটা 'উল্ল'-চিৎকার-বাণ চক্কর মারে নভ চিরে,
 দেখো ইশিয়ার মম প্রিয়তম, তীর-বাজ পাখি উড়ে
 তব শিরে !
 মোর জ্ঞানী পীর আজ খারাবির পথে, এতসো মোর সাধী
 পথ-বালা,
 ঐ হাফিজের মতো আমাদেরো পথ প্রেম-শিরাজীরই
 মদশালা !

ক্ষমা করো হজরত !!

তোমার বাণীতে করিনি গ্রহণ, ক্ষমা করো হজরত।
 ভুলিয়া গিয়াছি তব আদর্শ, তোমার দেখানো পথ
 ক্ষমা করো হজরত ॥
 বিলাস বিভব দলিয়াছ পায় ধূলিসম তুমি প্রভু
 তুমি চাহ নাই আমরা হইব বাদশা নওয়াব কভু
 এই ধরণীর ধন সম্ভার
 সকলের তাহে সম অধিকার
 তুমি বলেছিলে, ধরণীতে সবে সমান পুত্রবৎ ॥
 ক্ষমা করো হজরত ॥
 তোমার ধর্মে অবিশ্বাসীরা তুমি কৃপা নাহি করে
 আপনি তাদের করিয়াছ সেবা ঠাই দিয়ে নিজ ঘরে।
 ভিন-ধর্মীর পূজা মন্দির
 ভাঙিতে আদেশ দাওনি, হে বীর,
 আমরা আজিকে সহ্য করিতে পারিনাকো পর-মত ॥
 ক্ষমা করো হজরত ॥

তুমি চাহ নাই ধর্মের নামে গ্লানিকর হানাহানি,
 তলওয়ার তুমি দাও নাই হাতে, দিয়াছ অমর বাণী,
 মোরা ভুলে গিয়ে তব উদারতা
 সার করিয়াছি ধর্মাক্রতা,
 বেহেশত হতে ঝরে নাকো আর তাই তব রহমত ॥
 ক্ষমা করো হজরত ॥

সাম্পানের গান

(পূর্ববঙ্গের ভাটিয়াল সুরে)

ওরে মাঝি ভাই !
 ওরে সাম্পানওয়ালা ভাই !
 তুই কি দুখ পাইয়া কূল হারাইলি, অকূল দরিয়ায় ॥
 তোর ঘরের রশি ছিইরা রে গেল ঝাটের কড়ি নাই,
 তুই মাঝ দরিয়ায় ভাইসা চলিস সাম্পান ভাসাই ।
 ও ভাই দরিয়ায় আয়ে জোয়ার ভাটিরে
 তোর ঐ চক্ষের পানি চাই ॥

তোর চোখের জল ভাই ছাপাইতে চাস নদীর জলে আইসা,
 শেষে নদীই আইল চক্ষে রে জোর তুই চলিলি ভাইসা,
 ও তুই কলস দেইখা নামলি জলে রে
 এখন ডুইবা দেখিস কলস নাই ॥

তুই কূলে যাহার কূল না পেলি তারে অগাধ জলে
 কেন খুঁইজা মরিস ওরে পাগল সাম্পান বাওয়ার ছলে,
 ও ভাই দুই ধারে এর চোরাবালু রে
 তোর হেথায় মনের মানুষ নাই ॥

২

কি হইব লাল বাওটা তুইল্যা সাম্পানর উপর ।
 তোর বাওটায় যত লাগব হাওয়া রে
 ও ভাই ঘর হইব জের স্ততই পর ॥

তোর কি দুঃখ ভাই ছাপাইতে চাস বাঙটারে রাঙ্গাইয়া,
 এবার পরান ভইর্যা কাঁইদ্যা নে ভাই অগাধ জলে আইয়া,
 ও ভাই তোর কাঁদনে উইঠা আসুক রে
 ঐ নদীর খনে বালুর চর ॥

তুই কিসের আশায় দিবিরে ভাই কূলের পানে পাড়ি ;
 তোরা দীয়া সেখা না জ্বলে ভাই আঁধার দে ঘরবাড়ি ;
 তুই জীবন কূলে পেলিনা তায় রে
 এবার মরণ জলে তালাস কর ॥

বাঙটা—পান। দীয়া—প্রদীপ।

৩

তোমায় কূলে তুইলা বন্ধু আমি নামছি জ্বলে।
 আমি কাঁটা হইয়া রই নাই বন্ধু তোমার পথের তলে ॥
 আমি তোমায় ফুল দিয়াছি কন্যা তোমার বন্ধুর লাগি
 যদি আমার শ্বাসে শুকায় সে ফুল তাই হইলাম বিবাগী।
 আমি বুকের তলায় রাখছি তোমায় গো
 পইর্যা শুকাইয়াছিনা গলে ॥

যে দেশ তোমার ঘর রে বন্ধু সে দেশ খনে আইসা
 আমার দুখের সাম্পান ছাইরা দিছি চলতেছে সে ভাইসা,
 এখন যে দেশে নাই তুমি বন্ধু গো
 আমি সেই দেশে যাই চলে।
 আমি সেই দেশে যাই চলে ॥

চট্টগ্রাম
 জানুয়ারি ১৯২৯

অ-নামিকা

কোন নামে হয় ডাকব তোমায়
 নাম-না-জানা অ-নামিকা।

জলে স্থলে গগন-তলে

তোমার মধুর নাম যে লিখা ॥

গ্রীষ্মে কনক-চাঁপার ফুলে
তোমার নামের আভাস দুলে,
ছড়িয়ে আছে বকুল মূলে
তোমার নাম হে ক্ষণিকা ॥

বর্ষা বলে অশ্রুজলের মানিনী সে বিরহিণী ।

আকাশ বলে, তড়িত লতা, ধরিত্রী কয় চাতকিনী !'

আমি মেঘে রাখলো ঢাকি
নাম যে তোমার কাজল আঁখি,
শ্রাবণ বলে, জুঁই বেলা কি ?
কেকা বলে মালবিকা ॥

শারদ-প্রাতে কমলবনে তোমার নামের মধু পিয়ে
বাণীদেবীর বীণার সুরে ভ্রমর বেড়ায় গুণ গুনিয়ে !

তোমার নামের মিলমিলিয়ে
ঝিল ওঠে গো ঝিলমিলিয়ে
আশ্বিনে কয়, তার যে বিয়ে
গায়ে হলুদ শেফালিকা ॥

নদীর তীরে বেণুর সুরে তোমার নামের মায়া ঘনায়,
করুণ আকাশ গলে তোমার নাম ঝরে নীহার কণায় ॥

আমন ধানের মঞ্জুরিতে
নাম গাঁথা যে ছন্দ গীতে
হৈমন্তী ঝিম নিশীথে
তারায় জ্বলে নামের শিখা ॥

ছায়া পথের কুহেলিকায় তোমার নামের রেণু মাখা,
ম্লান মাধুরী ইন্দুলেখায় তোমার নামের তিলক আঁকা ।

তোমার নামে হয়ে উদাস
ধুমল হোলো বিমল আকাশ
কঁদে শীতের হিমেল বাতাস
কোথায় সুদূর নীহারিকা ॥

তোমার নামের শত-নোরী বনভূমির গলায় দোলে
 জপ শুনেছি তোমার নামের মুর্ছমুর্ছ কুহর বোলে।
 দুলালচাঁপার পাতার কোলে
 তোমার নামের মুকুল দোলে
 কৃষ্ণচূড়া, হেনা বলে,
 চির চেনা সে রাধিকা ॥

বিশ্ব রমা সৃষ্টি জুড়ে তোমার নামের আরাধনা
 জড়িয়ে তোমার নামাবলী হৃদয় করে যোগসাধনা।
 তোমায় নামের আবেগ নিয়া
 সিদ্ধু ওঠে হিল্লোলীয়া
 সমীরণের মর্মরিয়া
 ফেরে তোমার নাম—গীতিকা ॥